

Waor of niet waor?

Dick van Bloemendaal; tekening Gerard Schut

Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Veur julie un vraag, mar veur mien un weet, welke wel of niet waor bin.

Zwiëgplicht

Minsen die veul langs de weg zwarven heuren veul en kunnen dur vaak ok mooie verhaolen over vertellen. Straotemakers, die de hele dag op dur knieën an de weg liggen, zien veul en de postbode, de meteropnemer van ut gas en ut elektra, die dage-luks bie veul minsen in huus kommen zien en heuren ok veul. As ze dur over vertellen moe je netuurluk niet alles geleuven wat ze zèègen, mar je kun dur vaak wel merakels um lachen. Plie-sie's, notarissen, dominee's, pastoors, advocaoten en dokters zien en heuren ok heel veul, mar die maggen dur niet over prao-ten, die hen hun zwiëgplicht. Toch he'k us un verhaol e'heurd over un dokter en zun pesjent da'k greeg wil vertellen.

Bartus van den Brink zit mit zun vrouw an de tafel te broodeten en opees valt zun glaozen oog dur uut op de tafel. Ut rolt over de broodkruumels en de suukerkorrels die op tafel liggen en zit dur onder. Vur dat hie ut weer in zun oogkas wou stoppen nam hie ut effe in zun mond um de kruumels dur of te kriegen. Zun vrouw, die tegenover um an tafel zit, ziet dat en begint geliek tegen um te bekken dat ze dat vies viendt. Van schrik slikt hie ut oog in en wat hie ok prebeerde mit zun vingers in zun keel en zo, ut hulp niks, ut oog kreeg hie niet meer uut zun keel. De eerst kommende dagen het'ie veul koek e'geten um te preberen ut oog dur uut te kriegen, mar ut het niks e'hulpen, ut oog kwam niet mit zun ontlasting mee naor buuten. Nao un paor dagen is hie dur mee naor dokter Vonk e'weest um dur naor te laoten kieken.

De dokter zeit tegen um dat hie zun broek mar naor beneeën mos doen en krom veurover mos bukken zodat hie dur in kos kieken. De dokter ging dur gebukt achter staon en bekeek ut achterwark van Bartus, mar hie kos niks zien zitten. "Ik zie nog



helemaal niks, ut zal nog wel niet véér genog naor beneeën e'kommen wezen"zeit de dokter, mar Bartus zeit "Ik weet zeker dat ut al aordig naor achteren e'kommen is, want ik zie joe wel". De dokter werd un beetje narrug, nam un vergrootglas en Bartus mos weer krom veurover gaon staon en nao goed kieken zag de dokter iets schitteren. "Ik zie ut" zeit de dokter, "mar noe zie ik ut pas goed, kèèl, wat bin jie scheel", waarop Bartus kwaod werd en zei "man, ik bin niet scheel, ik loens alleen mar un beetje".

+++